



Ponte Be'eali, Suku Hatolia Postu Administrativo Hatolia, Ermera

PNDS

Hamutuk ita
dezenvelope nasaun

Febreiru 2015

Ponte Be'eali Fasilita Komunitade ba halo Negósiu iha Merkadu

Suku Hatolia implementa PNDS iha Faze I, bainhira programa ida ne'e hahú tama iha Suku Hatolia, comunidade sira organiza an no halibur hamutuk hodi identifika difikuldade dezenvolvimentu sá ida mak sira enfrenta atu nune'e bele resolve liu husi programa PNDS, no ikus mai sira konkorda hamutuk katak konstrusaun ponte iha Be'eali mak sai hanesan prioridade as liu iha Suku ida ne'e.

Anastasio Lemos Soares, hanesan comunidade, hateten katak "Konstrusaun ponte ida ne'e sai hanesan prioridade as liu iha Suku Hatolia, tanba bele fasilita sirkulasaun comunidade sira ba halo negósiu iha merkadu".

Funsaun husi ponte ida ne'e laos deit atu fasilita transporte públiku, maibé fasilita mós estudante sira ba eskola iha Hatolia Vila. "Ponte ida ne'e fasilita mós estudante sira ba eskola, tanba iha tempu udan hanesan ne'e fatin ida ne'e mota bot tebes los", hato'o husi Anastasio Lemos Soares.

Iha implementasaun, comunidade Suku Hatolia orgullu tebes ho programa PNDS no sira hatudu duni sira nia partisipasaun ne'ebé involve ema hotu tantu ferikatuas, juventude feto-mane inklui mós ita nia maluk sira ho deficiente liu-liu iha parte servisu ba konstrusaun ponte ne'ebé sira defini sai hanesan prioridade.

"Hanesan ema ho deficiente, ha'u nia papél iha konstrusaun ne'e mak ajuda lalin sasán ba badain sira tuir forsa ne'ebé iha", Filomino Salsinha, hanesan juventude.

Martinha de Castro, hanesan juventude feto husi Suku ida ne'e hatete katak : "Hau kontente ho programa PNDS, tanba programa ida mai atu halo dezenvolvimentu iha ami nia Suku, no ami prontu fó ami nia kontribuisaun ba servisu hanesan lalin fatuk nomós material konstrusaun ba ema servisu".

Durante servisu ba konstrusaun ponte, grupu servisu ne'ebé forma husi Ekpa Implementasaun Programa (EIP) halo servisu rotativu ne'ebé involve comunidade mai husi aldeia 4 mak hanesan Hatu Batu, Aimeraulo, Hohopu no Simhei. Kada Grup u servisu ne'e involve ema na'in 7 no servisu durante semana ida, depois grupu ida ne'e kompleita servisu iha semana ida, troka fali ho grupu no ema husi aldeia seluk, i kontinua halo rotasaun to'o konstrusaun ne'e finaliza.

Orsamentu ba konstrusaun ponte ida ne'e nia montante \$38,572,- no comunidade ne'ebé hetan benefísiu husi konstrusaun ponte ida ne'e laos deit comunidade husi Suku Hatolia deit maibé Suku vizifnu hanesan Leimea Sorin Balu, Koliati Leten, Leimea Kraik no iha possibilidade bo'ot comunidade husi Sub-Distritu Letefoho mós sei hetan asesu husi konstrusaun ida ne'e.

Programa PNDS laos rezolve deit infraestrutura báziku ne'ebé comunidade hakarak, maibé iha programa ida ne'e fo mós kapasitasaun ba comunidade oin sá sira bele idéntifika rasik problema dezenvolvimentu ne'ebé comunidade enfrenta no ikus mai comunidade rasik mak implementa no sira rasik mak sei sai nain ba konstrusaun ne'ebe sira konstrui.

Progresu

Pilotu: Remata ona

Faze 1: Etapa 11 / 12

- Kompleta konstrusaun, no entrega ba ekipa operasaun no manutensaun
- Enkontru Akontabilidade Final

Faze 2: Etapa 8 / 9

- Finaliza kontratu ho comunidade, no implementa projetu
- Transfere primeiru prestasaun hosi fundus infra-estrutura (50%), no hahú konstrusaun


Faze 3: Etapa 4

- Treinamentu ba ekipa jestaun suku no fasilitadór suku sira




Prioridade sira

Faze 1



Faze 2



- Saude
- Bee Mos no Saneamentu
- Edukasaun, Cultura e Desportu
- Agricultura, Siguranca Alimentar no Buka Moris
- Dalan, Ponte no Kontrolo de Cheias
- Solidariedade Sosial
- Sektor Seluk



Municipal Cross Visit neebe halao iha Municipiu Baucau.



Diretór Delegasaun PNDS Munisípiu Liquisa, Fernando Gonçalves, apresenta kona-ba Jestaun Rekursu Umanu.

Atu hetan informasaun tan:
www.pnds.gov.tl
info@pnds.gov.tl

Atu fo imi nia hanoin:
keixa@pnds.gov.tl

PNDS Fo Benefisia Komunitade Iha Suku Fuat

Implementasaun programa PNDS ne'ebé implementa iha Suku Fuat, Postu Administrativu Iliomar, Munisípiu Lautem, fo duni benefisiu ba comunidade iha suku laran, informasaun ida ne'e identifika bain hira ekipa komunikaun akompaña ekipa Coo. Chefia/DGDL, Miguel Pereira de Carvalho ba vizita servisu programa PNDS iha Postu Iliomar (10/02/2015).

Martins Pinto, Chefe Suku Fuat hatete katak : "Antes ne'e hau nia comunidade atu asesu ba hetan bee mós sira tenke la'o ain mais ou menus km 1 resin, maibé ho implementasaun programa PNDS, comunidade sira nia problema bee mós bele rezolve ona no sira bele hetan ona bee mos iha suku laran rasik". PNDS laos projetu maibé PNDS nu'udar programa ida ne'ebé mak atu kapasita mós comunidade sira oin sá sira bele identifika rasik sira nia problema dezvoltimentu ne'ebé sira enfrenta iha sira nia Suku laran, no liu husi programa PNDS comunidade mak sai hanesan autór ba dezvoltimentu iha sira nia Suku laran.

Coo. Chefia/DGDL, Miguel Pereira de Carvalho, iha ninia vizita ida ne'e hatete katak xave atu fó susesu ba dezvoltimentu iha Suku laran mak comunidade hotu ninia partisipasaun, no nia husu komponente suku hotu atu hola parte iha implementasaun programa PNDS iha suku ida-idak, tanba PNDS mak programa Governu ninia ne'ebé determina dezvoltimentu iha Suku no Aldeia liu husi finansiamentu ba infraestrutura bázika ne'ebé comunidade sira deside hamutuk. Diretór Jeral Dezenvolvimentu Lokál mós husu ba comunidade sira atu kuidadu no tau atensaun didi'ak programa fiziku ne'ebé implementa ona liu PNDS, atu nune'e bele utiliza ba iha tempu ne'ebé naruk.



Ekipa husi Munisípiu 4 Fahe Esperensia Kona-ba Implementasaun PNDS

Sekretariadu Tékniku PNDS Nasionál, organiza Administradór Munisípiu no Diretór Delegasaun husi Munisípiu 3 (Aileu, Ermera no Liquisa) halo vizita servisu iha Munisípiu Baucau (17-18/02/2015), atividade ne'e realija ho nia objetivu atu troka opinioins ba malu liu-liu kona ba implementasaun Programa PNDS iha Munisípiu ida-idak. Eventual ba dahuluk iha atividade ne'e mak ekipa husi Munisípiu 3 hasoru malu ho autoridade sira iha Munisípiu Baucau, oinsá atu informa agenda kona ba atividade loron 2 ne'ebé mak atu hala'o.

Olderico Lopes, Xefe Departamentu Implementasaun Programa hanesan mós Xefe delegasaun ba eventual Municipal Cross Visit ida ne'e hato'o introdusaun katak : "Programa ida ne'e hala'o para atu troka esperensia ba malu kona-ba implementasaun programa PNDS ne'ebé Munisípiu hotu hala'o ona".

Administradór Munisípiu Baucau, Antonio A. Guterres ne'ebé simu ekipa iha edifísiu Munisípiu Baucau, hato'o agradementu ba ekipa hotu tanba iha boa vontade atu fahe esperensia ba malu kona ba programa PNDS ne'ebé Munisípiu implementa no esperensia ne'ebé fahe liu husi atividade ida ne'e bele sai hanesan referénsia ida ba Munisípiu hotu, espesiál Munisípiu Baucau atu nune'e bele implementa programa PNDS ho diak liu tan.

Martinho Alves Sequeira Matos, Administradór Munisípiu Aileu, participa iha atividade ida ne'e, iha ninia intervensaun hatete katak: "PNDS Programa Governu ninia, no presiza liña seitor hotu ninia kordenasaun, tanba ejijénsia husi comunidade ne'e ejijénsia ne'ebé mak variedade".

Alende reuniaun iha loron primeiru Munisípiu District Cross Visit, atividade ne'ebé hala'o mak halo apresentasaun matéria husi Diretór Delegasaun PNDS Munisípiu 3 liu-liu kona ba estratéjia no jestaun hodi fó susesu ba implementasaun programa iha munisípiu ida-idak. Matéria hirak ne'e mak hanesan jestaun rekursu umanu, apresenta husi Diretór Delegasaun PNDS Munisípiu Liquisa, Fernando Gonçalves, Estratéjia Implementasaun PNDS, apresenta husi Diretór Delegasaun PNDS Munisípiu Aileu, Abel da Conceição no Diretór Delegasaun PNDS Munisípiu Ermera, João Bosco Soares, apresenta kona ba Kordenasaun Lina Seitoral.